



Inatsisartunut ilaasortaq Esmar Bergstrøm
Demokratit

Naalakkersuisunut apeqqut: Sulisoqarnermut akitsuut pillugu Inatsisartut inatsisissaannut siunnersuummut, 2005-imi aasakkut siunnersuutigineqaqqaartumut (UKA 2005/52) tunngatillugu.

22. maj 2012

Sulisoqarnermut akitsuut pillugu Inatsisartut inatsisissaannut siunnersuummut tunngatillugu apeqqutit katillugit 13-it Inatsisartunut ilaasortap allakkatigut 12. januar 2006-imeersutigut Naalakkersuisunut saqqummiuppai.

Postboks 1037
3900 Nuuk
Oq/tel +299 34 50 00
Fax +299 32 46 14
oed@gh.gl
www.nanoq.gl

Inatsisartunut ilaasortaq isumaqarpoq inuussutissarsiutinik ingerlataqartut minnerit ilungersoreeqisut aningaasartuutinik amerlanerusunik akiliinissaminnut periarfisaqanngilluinnartut. Maannangaaq misigisareerparput suliffeqarfinni minnerni sulusut akuttunngitsumik soraarsinneqartartut imaluunniit angerlartiinnarneqartartut sulisitsisut aningaasarsiornermikkut ilungersuuteqarnerat pissutigalugu, taamaaligaangallu sulisartut eqqorneqartut assigiinngitsutigut isumaginninnikkut ikiuutisainik inuussuteqartariaqarlutik. Isumaginninnikkut ikiorsiissutinut aningaasartuutit siunnersuutip nassatarisaanik amerlinissaat naatsorsuutigisariaqarpoq, kiisalu akissarsiassaralui arlaatigut iliuuseqarnikkut sulisitsisuisa akiliutigiinnartariaqalisavaat, taamaalillunilu piitsut suli piitsuunerulertussaallutik.

Kinguliini akissutinni Inatsisartunut ilaasortap apeqqutai **taartumik** allataapput, akissutillu naqinnerit nalinginnaasut atorlugit allataallutik.

- a. Inatsisartunut siunnersuut taama isikkoqartoq saqqummiuteqqinnissaa Naalakkersuisut eqqarsaatigaat, aamma**
b. Siunnersuutip allanngortinneqarnissaa Naalakkersuisut eqqarsaatigippasuk, allannguutit suut ilanngunniarneqarpat?

UPA 2006-imi saqqummiussinissaq siunertaralugu siunnersuummik Naalakkersuisunut saqqummiussaqaarnissara naatsorsuutigaara. Siunnersuummut siusinerusukkat saqqummiunneqartumut sanilliullugu allannguutaajumaartussat oqaasertalersuinermit tunngasuunerussapput. Aamma 2006-imi aningaasanut inatsisissatut siunnersuummi kontu 24.13.50, missingersuutinut ilanngussaqaq innersuussutigisinnaavara.

- c. Siunnersuut tusarniaassutigeqqinniarneqarnerluni? Taamaassappat kikkut tusarniaaffigineqassanersut paaserusunnarpoq?**

Siunnersuut 2006-imi januarip naalernerani februarillu aallartinnerani KANUKOKA-mut, SIK-mut, Kalaallit Nunaanni Sulisitsisut Peqatigiiffiannut, ILIK-mut, KNAPK-mut, APK-mut, Ilaqutariinnermut Pisorta qarfimmu, Aalisarnermut Piniarnermullu Pisorta qarfimmu, Aningaasaqarnermut Pisorta qarfimmu, Kultureqarnermut, Ilinniartitaanermut, Ilisimatusarnermut Ilageeqarnermullu Pisorta qarfimmu, Sulisoqarnermut Pisorta qarfimmu aamma Ineqarnermut Attaveqaqatigiinnermullu Pisorta qarfimmu tusarniaassutigeqqinneqarpoq.

d. Paaserusunnarpoq taxa-nik sammisallit tusarniaaffigineqarsimanerlutik imaluunniit siunnersuut allatigut oqaaseqaateqarfigitinneqarsimanerluni. Taamaassimappat taama sammisallit oqaaseqaataat erseqqinnerusumik nasuiaateqarfigeqquneqarput. Tamanna pisimangippat paaserusunnarpoq sooq Naalakkersuisut suliaqarfik malittarisassat atuutereersut tungaasigut akornutaasumik sunniuteqarfigineqartut tusarniaaffigissallugu pissutissaqarsorisimangikkaat?

Siunnersuut immikkoortoq c-mut akissummi takuneqarsinnaasutuut taxa-nik sammisalinnut tusarniaassutigineqanngilaq, ilisimaneqartummi malillugit taxa-tillit nuna tamakkerlugu kattuffeqanngillat taakkununga sinniisuusinnaasumik. Taaneqareersutuut Kalaallit Nunaanni Sulisitsisut Peqatigiiffiat aamma ILIK tusarniarneqarput.

e. Siunnersuummut oqaaseqaatini allassimavoq inatsisissatut siunnersuut allaffissornikkut inuussutissarsiutinik ingerlatalinnut kinguneqartussaangitsoq. Tamanna sulisitsisut annerit eqqarsaatigalugit soorunami ilumoorpoq, akileraarutit A-t ileqquliutiinnarlugu ilanngaareertartunut. Aaammali ilumoornerpa aalisartuaqqat, piniartut, savaatillit motoorilinnillu qamutaatillit eqqarsaatigigaanni, nalinginnaasumik aalajangersimangitsumik sulisoqartartut?

Inatsisissatut siunnersuutip inuussutissarsiutinik ingerlatalinnut allaffissornikkut sunniuteqartussaanginneranik inatsisissatut siunnersuummut UKA 2005-imi saqqummiunneqartumut oqaaseqaatini allassimasoqarnerarlugu apeqqummi oqarneq ilumuunngilaq.

Immikkoortumi "Inuussutissarsiuteqartunut aningaasaqarnikkut allaffissornikkullu kingunerisassat" ilaatigut allassimavoq "Tungaviusumik naliliisoqarpoq akiliisarnerup aammalu akissarsiat tamarmiusut akitsuutinik akiliuteqaataasussat ataatsikkoornerulernerat inuussutissarsiuteqartunut arlalippassuarnut allaffissornikkut oqilisaataasasoq, taamatullu sulisitsisut ataasiakkaat akiliutit eqqortuunersut imaallannaq nalilersinnaassallugit."

Sulisitsisut akissarsianik aalisarnermit, aallaaniarnermit, piniarnermit, nunalerinnermit aamma qamutit motoorillit inunnik angallassissutit atorlugit sulinikkut pisunik tunniussaqaartartut AEB-mut akiliisussaataasimangillat, siunnersuulli malillugu sulisoqarnermut akitsuummik siunissami akiliisartussanut ilaalersussaallutik. Aamma siunnersuummi ilaavoq sulisoqarnermut akitsuut sulisitsisut akileraarutinik A-nik

unerartitaminnik akiliinissaat assigalugu peqatigalugulu akilerneqartartussaasoq. Naak inuussutissarsiutinik taaneqartunik ingerlataqartut akitsuummik siunissami akiliisalersussaagaluartut tassuunakkut allaffissomissaat annikitsuaraannaassaaq.

f. Aalisarnerup, aallaaniarnerup, piniarnerup, nunalerinerup taxa-nillu ingerlatsinerup iluani sulisitsisut minnerit sulisoqarnermut akitsuutinik pissarsinarfigisarneri sunniuteqartinniarlugit pisariillisartinniarlugillu periarfissat aalajangersimasut suut Naalakkersuisut takorloorpaat?

Imm. e-mi akissut innersuussutigineqarpoq.

g. Sulisitsisut akileraarutinik akitsuutinillu ilanngaanissamut akiliinissamullu eqquutsitsinngitsut eqqarsaatigalugit qanoq pineqaatissinneqartarnissaat eqqarsaatigineqarpa?

Akileraartarnermi akitsuusiisarnermilu tamatigut periusiusartooq naapertorlugu, aammalu siunnersuummi UKA 2005-imi saqqummiunneqartumi takuneqarsinnaasutuut, unerartitsisussaataitanermik akiliisussaataitanermillu unioqqutitsinerit pil-laammik akiliisitsinikkut pineqaatissiissutigineqartarput.

h. Nunatsinni suliaqarfiit aningaasaqarnikkut ingerlalluanngereersut amerlanernik akitsuusersornerisigut siunissaq ungasinnerusoq eqqarsaatigalugu inuiaqatigiit aningaasarsiornerat iluanaaruserneqassanersoq Naalakkersuisut isumaqarfigaat?

Suliaqarfiit aningaasaqarnikkut ingerlalluannginnerit akitsuutinik amerlanerusunik akiligassinneqarnissaat siunnersuummi siunertarineqanngilaq.

Eqqaamaneqassaaq aalisarnermik, aallaaniarnermik, piniarnermik, nunalerinermik aamma qamutit mootorillit inunnik angallassissutit atorlugit ingerlatsinermik suliaqartut AEB-mut akiliuteqartussaannginnerannut patsisaammat akiliutit ilinniakkanut taaneqartunit allaasunut ilinniagaqarnermut atorneqarnissaat siunertaralugu akiligassiissutigineqartarnerat.

Taassuma paarlattuanik sulisoqarnermut akitsuutip siunertaraa ilinniartitaanerit suogaluartulluunniit iluanni suliniuteqarnerunissap inuussutissarsiutilinnit aningaasalersueqataaffigineqarnissaa, taamaaliornikkut siunissaq ungasinnerusoq eqqarsaatigalugu innuttaasut ilinniarluarsimanagerusut pigilersinnaagatsigik tassuunakkullu nammineernerulluta aningaasarsiorsinnaalernissarput tunngavissaqarnerulersissagatsigu. Taamaammat suliaqarfiit ilaasa suliniuteqarnissamut tassunga akileeqataalaarnissamut ilaatinneqannginnissaat tunngavissaqarsorineqanngilaq.

Tassunga ilutigitillugu pingaartillugu isiginiarneqarpoq, akitsuummik akiliisussaati-taanngitsosqassappat tamatuma pineqartunut tapiissutitut sunniuteqartussaanera. Taamaaliornissaq akiliisussaataitanngitsut tamarmik akileraarutitigut tapiiffigineqar-

nerattut sunniuteqassaaq, taamaammat imaangilaq pisariaqartitsinerpaat tassa-assasut tapiissutinik iluaqutiginninnerpaasussat.

Taamaammat tapiiffigineqarnissamik pissutissaqavissut pisariaqartitsivissullu toqqaannartumik siunertaqartumillu tapiiffigissallugit pitsaanerussaaq, akileraarutigut tapiissuteqarneq aqqutiginau.

i. Sulisoqarnermut akitsuummik akiliinissaq pillugu sulisitsisoq Akileraarternermi Isumasioqatigiit aamma Nunatta Eqqartuussiviata aalajangiinerani sulisitsisoq naammaginninngitsoq immikkut akiliuteqarani allatulluunniit inatsilerituunik ikiorteqarnermi aningaasartuutiminik matussusiinissaminut qanoq periarfissaqartigissava kiisalu Østre Landsret-imi eqqartuussisoqasagaluarpat Danmarkimut uterlugulu angalassagaluaruni angalanernut najugaqarnernullu aningaasartuutit matussusernissaat eqqarsaatigalugu.

Akiliuteqarani eqqartuussivitsigut ingerlatsinissamut ullumikkut inatsisitigut maleruagassaqanngilaq, kisianni Kalaallit Nunaata Landsdommeria akiliuteqarani eqqartuussivitsigut ingerlatsisinnaanermik periususartut malillugit akuersisuteqarsinnaavoq.

Tassa imaappoq sulisitsisoq akiliuteqarani eqqartuussivitsigut ingerlatsinissamik Kalaallit Nunaata Landsdommerianut qinnuteqaateqarsinnaavoq.

Tamatuma saniatigut aamma sulisitsisoq aningaasartuutininut taamaattunut matussutissanik tapiiffigineqarnissamik aningaasaateqarfinnut, suliaqartut peqatigiiffiinut il.il. qinnuteqarsinnaavoq, soorluttaaq sulisitsisut inatsisitigut siunnersorneqarnissamut sillimasiinerni ilaatinneqartut aningaasartuutitik tamakkiisumik ilaannakuusumilluunniit taanna aqqutigalugu akilersissallugit periarfissaqarsinnaagunartut.

Illassutigalugu oqaatigisinnaavara akileraarternerup akitsuusiisernerullu iluanni suliasanik Østre Landsret-imut suliakkiissutigineqarsimasunik suliaqartarneq nalinginnaasumik Nuummi pisarmat, eqqartuussiviup taassuma Nuummiinnera iluatsillugu.

j. Iluanaarutissat saniatigut akiliutaasartut ilinniartitaanerullu akornanni ataqatigiinnerup peerneqarnerani iluaqtissat suut Naalackersuisut takorloorpaat?

Ilinniaqqinnissamut ingerlaqqiffiusumillu ilinniarnissamut aqqissuussinermut maannakkut atuuttumut aalajangiisuupput aningaasat AEB-mut akiliutigineqartartut, sulisitsisut tunngaviusumik inuussutissarsiutinik ilinniakkani ilinniartunut akisarsiaritittagaannut tapiissutitut aningaasartuutit kiisalu isumaginninnermut peqqinnissamullu ilinniakkani ilinniartut ilinniagaqarnerisutisiaannut aningaasartuutit. Tamatuma ilaatigut nassatarisarpaa inuusuttut inuussutissarsiutinik ilinniakkamik aallartitsisut amerligaangata aningaasat ilinniaqqinnissamut ingerlaqqiffiusumillu ilinniarnissamut atorneqartussat ikilisarnerat.

Ullumikkut imaappoq akiliutitut isertinneqartut katillutik annertussusiat ilinniaqqinnissamut periarfissat suut akissaqartinneqarnerannut aalajangiisuusarluni, inuiaqatigiit ilinniagaqarnerup qaffasissusianut kissaataannut pisariaqartitaannullu aalajangiisuunani. Atorneqarfissaannik siumut aalajangiussereertarneq naleqqutinngilaq, ilinniakkammi suulluunniit tamarmik qaffassarneqarnissaat kissaataavoq.

k. Akitsuutitigut isertitassat amerlinerunissaannik naatsorsuutigisat atorlugit suliniutit aalajangersimasut suut aningaasalersorneqassanersut pillugit Naalackersuisut qanoq naatsorsuutigisaqarpat?

Sulisoqarnermut akitsuut akitsuutit allat assigalugit landskarsimut nakkartartussaavoq. Akitsuutikkut isertitassat taaneqareersutuut ingerlatassanut aalajangersimasunut siumut aalajangiuteriigaanngillat. 2006-imut aningaasanut inatsimmi ukiunilu tulliini missingersuusiorfiusuni aningaasat ilinniaqqinnissamut aamma piginnaasanik ineriartortitsinissamut atugassat sulisoqarnermut akitsuutikkut isertinneqarumaartussatut naatsorsuutigisanit annertunerujussuit immikkoortinneqareerput.

l. Inatsisissatut siunnersuutip kinguartinneqarnissaanut Sulisitsisut Peqatigiiffiata inassutigisaa sooq Naalackersuisut malinngilaat, eqqarsaatigineqarmat suleqatigiissitanik pilersitsisoqassasoq, inatsisissatut siunnersuummik misissuinissanik, taamaalereerpallu Piginnaasaqarnermik Ineriartortitseqatigiinnut Naalackersuisut pilersissimasaannut saqqummiullugit?

Sulisoqarnermut akitsuummik siunnersuut akitsuummik Landskarsimut akiligassinermut tunngasuuvoq. Piginnaasanik Ineriartortitsinissamik Siunnersuisoqatigiit ilaatigut suliassaraat aningaasanut inatsit aqqutigalugu ilinniartitaanernut aningaasaliissutaasartut qanoq atorneqartariaqarnerannut inassuteqaatinik saqqummiussinissaq. Allatut oqaatigalugu, inatsisissatut siunnersuut aamma Piginnaasanik Ineriartortitsinissamik Siunnersuisoqatigiit suliassat imminnut attuumasuteqanngillat.

Suleqatigiissitaliamik pilersitsisoqarnissaa pillugu siunnersuummut tunngatillugu oqaatigineqassaaq taamaattumik pilersitsinissamik pisariaqartitsisoqarnera tusarniaanermut akissutini tiguneqartuni sukkulluunniit tunngavissinneqanngimmat.

m. Suliami pineqartumi pingaarutilinnik allanik Naalackersuisut saqqummius-sassaqarnerlutik?

Siunnersuutip UPA 2006-imi saqqummiunneqarnissaata utaqqimaarneqarnissaa pissusissamisoorineruara.

Naggataatigut ajuusaarutigaa Inatsisartunut ilaasortap apeqqtai taama kingusitsigisumik akineqarmata.

Inussiarnersumik inuulluaqqusillunga
Med venlig hilsen

Josef Motzfeldt